

Novas stentas per instruir uffants rumantschs a Turitg

Radunanza generala da la Quarta Lingua

■ **(anr/vi) D'obtegnair instrucziun en la lingua materna sa chapescha da sazez per in uffant da Sri Lanka che viva en Svizra – ma betg per in uffant rumantsch en la diaspora. L'emna passa da han ins tratg a strada il tema a la radunanza generala da la Quarta Lingua (QL) a Turitg.** Il problem exista dapi haiais e fin uss n'han ins chattà nagina soluziun. Tant la QL sco er l'Uniun dals Rumantschs da la Bassa (URB) han adina puspè exprimì ch'era uffants rumantschs ordaifer il Grischun duessan pudair visitar curs. Las emprovas da metter en pe insatge han dentant adina fatg naufragi – u pervi da la dumonda dals idioms u perquai ch'i mancava personas d'instrucziun u ch'i deva mo paucas annunzias.

Uss è *Petra Camathias* sa messa en ils stadals. La suprastanza da la QL emprova d'organisar ina purschida. A la radunanza generala ha ella explitgà tge ch'ella ha interprendì e cuntanschi fin ussa.

Camathias: «Igl è in desaster»

En num da la QL, da l'URB e da la Lia Rumantscha haja ella contactà geniturs a

Turitg, ha ditg *Camathias*. L'interess fiss avant maun per 15 uffants da scolina e dal stgalim bass. Plinavant hajan ins chattà ina persuna d'instrucziun e las localitads necessarias. «Scolars e scolasts fissan pia prontos. I manca mo anc las finanzas.» Per recaltgar daners vul la QL contactar las autoritads da la citad u forsà era dal chantun. Daners da privats u ord legats fissan era bain d'engrà.

«Igl è in desaster», di *Camathias* ch'è giurista e mamma da duas mattatschas. A Turitg porschian ins instrucziun da lingua ad uffants ord famiglias da la Grecia, dal Cosovo, da la Russia e.u.v. «Ma ils uffants rumantschs, che han er il dretg, han ins fin uss tralascià.»

QL ha sustegnì 14 projects

Las tractandas ordinarias ha la radunanza liquidà a moda speditiva. Las duas presidentas *Bettina Berther* e *Barbla Strebhel* han orientà davart las activitads da promoziun tenor l'intent da la QL: Il 2013 ha l'uniun concedì mintgamai radund 1000 francs per 14 publicaziuns u portatuns rumantschs. Er a sia proxima sesida decida la suprastanza puspè da-



Las co-presidentas *Bettina Berther* e *Barbara Strebhel* mainan dapi in onn l'uniun che promova il rumantsch.

vart 13 dumondas per projects litterars u da musica.

L'onn passà ha la QL incassà radund 16 000 francs e spendì 21 000 francs. Grazia ad in gudogn sin il depot da 12 000 francs sa resulta in avanzament da 7000 francs. La facultad da la QL ha cumportà radund 99 000 francs la fin dal 2013.

Rico Valär sco referent

Suenter la radunanza ha referì *Rico Valär* davart il moviment per il rumantsch tranter il 1863 e 1938. Il romanist ha perscrutà las ragischs e raschuns per quest moviment per sia dissertaziun. Ils commembers da la QL èn stads fascinads da las expectoraziuns. Dapli davart quest tema san ins leger en il cudesch «Weder Italiener noch Deutsche!». En questa publicaziun fa Valär urden cun enqual cliché «patriotic» che pertutga la renaschientscha rumantscha d'avant tschient onns.

La nova adressa da l'uniun: Quarta Lingua, Neptunstrasse 2, 8032 Turitg. contact@quartalingua.ch. Telefon: 044 362 61 26